

《瑜伽師地論》之「天人四輪」注釋

綜貫「天人四輪」之福德善根而趣向於止觀解脫，依《瑜伽師地論》注釋，即處所圓滿、教導圓滿、正行圓滿、資糧圓滿四者。

住合適處 = 處所圓滿（五種妙好所住方處）

依止善士 = 教導圓滿（正士善友）

自正志願 = 正行圓滿（五種相自發正願）

宿已作福 = 資糧圓滿（宿所作福）

《瑜伽師地論》卷99：

又處所圓滿、教導圓滿、正行圓滿、資糧圓滿為所依止，應知建立人天四輪。

五種妙好所住方處，名「處所圓滿」，廣說應知如聲聞地。

正士善友，名「教導圓滿」，廣說應知如聲聞地及菩薩地。

由五種相自發正願，名「正行圓滿」。何等為五？

一於正教授，能敬順取；

（《瑜伽師地論》卷89：「正教授者，謂有三種正友所顯：一者大師，二者軌範、尊重，三者同梵行者及住內法在家英叡，如是名為三種正友。諸有智者，從彼應求積集善門真正教授。」(CBETA 2019.Q4, T30, no. 1579, p. 801b11-15)

二行無違逆；

三如實自顯（=無有諂曲，不正直）；

四其教授師〔處〕，隨所獲得精麤衣服、飲食、臥具便生喜足。

五無間殷重二種加行，樂斷樂修，乃至修習四種苾芻愛取對治。

（《瑜伽師地論》卷89：「云何無間殷重加行？謂常所作，委悉（=詳細）所作，勤精進住，當知即依止觀加行。」（CBETA 2019.Q4, T30, no. 1579, p. 801c11-12）

又宿所作福補特伽羅宿世善根增上力故，應知有五相果勝利：

1．謂宿所作福增上力故，安住二種可愛果報：一內，二外。

內可愛果報者，謂長壽久住，妙色端嚴，無病、少惱、非僕、非女、非半擇迦（梵paṇḍaka，指先天不具男根、不完整，或有損壞、不能生子等=異熟障），智慧猛利，發言威肅，具大宗葉。

外可愛果報者，謂生富貴家。如經廣說：大富大翼，有大侍衛，是名第一宿所作福相果勝利。

《阿毘達磨大毘婆沙論》卷82：具大宗葉多諸眷屬、僮僕作使，象馬輦輿（拉車），恆受快樂。（CBETA 2019.Q4, T27, no. 1545, p. 424c23-24）

2．又宿所作福增上力故，得善安住，非諸魍魎、藥叉、非人、守宅神等能為障礙，謂於財位不作障礙，或於壽命不作障礙，是名第二宿所作福相果勝利。

3．又宿所作福增上力故，性於善法，心能趣入，修習無怠，是名第三宿所作福相果勝利。

4．又宿所作福增上力故，性於惡行，深自懇愧；雖作惡已，時時發起猛利悔心。由此因緣令已作惡現在微劣，於當來惡能永遠離，是名第四宿所作福相果勝利。

5· 又宿所作福增上力故，一切事業方便加行，意趣伎能，展轉昌盛。凡所施為無不敬順，少用功力，多有成辦，是名第五宿所作福相果勝利。

如是四種，天上諸天，人中諸人，所有止觀勝妙車輪，隨有所闕其車不轉。

(CBETA 2019.Q3, T30, no. 1579, p. 874b14-c16)